

TUTÚ NÍ CADÚHA TÉ PǼBLÚ QUIHIⁿ NDAHA ÑÁYIU ÑUÚ CÒLOSÁ

Té PǼblú cǎdũha-dé tutú quihiⁿ ndaha ñáyiu xĩndecu ichi Xítóhó Jesucrístú ndécú ñúú Còlosá

¹ Yúhú té PǼblú ní tendaha ñaha Yá Ndiõxí cǎháⁿ-í tnúhu Xítóhó Jesucrístú núú ñáyiu chi ducaⁿ cùní mée Yǎ Ndiõxí cunduu, te cǎdúha-í tutú-a ndihi té Timúteú ² cuendá daquixi-í ndaha nchòhó ñáyiu ñúú Còlosá, ñáyiu cùu cuendá Yǎ Ndiõxí, ñáyiu quide ndáá ndécú ichi Xítóhó Jesucrístú, te xicáⁿ táhù-í núú Tǎtá-ó Dǔtú Ndiõxí sá ïo na chĩndee chitúu ñaha-gǎ xii-ndo, te ducaⁿ ndì nduú-gá ná cǎdá te ío váha cuu iní-ndó cùndecu-ndo.

Té PǼblú cǎháⁿ ndihi-dé Yǎ Ndiõxí cuendá ñáyiu sǎndáá iní ñáhá xii Xítóhó Jesucrístú

³ Te ducaⁿ-ni cǎháⁿ ndihi-ndí Yǎ Ndiõxí Yaá cúú Tǎtá Xítóhó Jesucrístú ndàcáⁿ táhú-ndí núú-gǎ cuendá nchaa nǎcuáa quide-ndo ndecu-ndo, ⁴ chi ñihí-ndí tnúhu sá ïo sǎndáá iní-ndó Xítóhó Jesucrístú, te ducaⁿ ïo cùu iní-ndó nchàa ñáyiu cùu cuendá Yǎ Ndiõxí. ⁵ Te ducaⁿ quide-ndo chi sǎndáá iní-ndó sǎ ndúú táhú-ndó cùndecu-ndo núú ndécú Xítóhó Jesucrístú, te tnúhu-áⁿ ní ñihí-ndó cǔtnáhá ní xĩndedóho-ndo tnũhu ndáá tnúhu Xítóhó Jesucrístú. ⁶ Te tnúhu Xítóhó Jesucrístú tá xité nuu-xi ñihí ñuyú cuáháⁿ. Te vai ñáyiu ta sǎndáá iní-yu cuáháⁿ, te ta quidé-yu mee-ni sǎ vǎha cuáháⁿ

ndécũ-yu ichi-gá. Te nchòhó chi ndéé cútnàhá ní tecú dóho-ndo tnũhu-gá ní quesaha-xi ta cùu vai ñáyiũ ñuú-ndó tá quide ndáá-yu núú-gã cuáháⁿ. Te dàvá-áⁿ ñi cutnùní ndáá ndisa iní-ndó sã Yã Ndiõxí ío chindee chitúu ñaha-gá xii-ndo. ⁷ Te ducaⁿ ñi dánèhé ñáhá tẽ Ěpafrás tée ío cùu iní-ndí, chi tnàhá-dé ío quide ndáá-dé xínú cuèchi-dé núú Xítohó Jesucristú quidé-dě núú-ndí dácuaaha ñaha-dé xii-ndo tnũhu-gá. ⁸ Te càchí tnúhu-dé xii-ndí sá ío cùu iní ñáhá-ndó xii-ndí, te ducaⁿ quide-ndo chi Espíritú Yã Ndiõxí chíndèe ñaha-xi xii-ndo.

⁹ Te ndéé cútnàhá ní níhí-ndí tnúhu nàcuáa quide-ndo ndecu-ndo ndéé dàvá-áⁿ ñi ngúíta-ndí ñá túú dàña ndee-ndí xìcáⁿ táhú-ndí núú Yã Ndiõxí cuendá-ndó sã Espíritú-gá ná tàxi-xi nchaa-gá sá cúmání quiní tnùní-ndó, te ducaⁿ te cutnùní váha-gá iní-ndó nàcuáa cuìní Yã Ndiõxí cada-ndo. ¹⁰ Te sá dúcáⁿ te ndacu-ndo càda-ndo mee-ni sá vãha dàtná cuìní Xítohó Jesucristú cada nchaa ñáyiũ ndècu ichi-gá. Te ducaⁿ ío nduu vétú iní-gá te núu na càda-ndo nchaa núú sã vãha. Te ducaⁿ ío-gá cuita cutnùní iní-ndó nchàa nàcuáa cuìní Yã Ndiõxí cada-ndo. ¹¹ Te mee-gã cúú-gã Yaá ío cùnuu, te ñu-gá ío chindee ñaha-gá xii-ndo, te cudíí iní-ndó cuèi nándi na càda ñaha ñáyiũ xii-ndo sã cuendá-gá, te ducaⁿ ío cunduu càhnu iní-ndó. ¹² Te ndacáⁿ táhú-ó núú Dütú Ndiõxí chi ní quide túha ñaha-gã xii-o cuendá nduu táhú-ó cùndecu-o ndíhi nchaa dawa-gá ñáyiũ yìndaha-gá xìndecu núú cándòo canine ñá túú tnàhí-gá ñi ñiⁿ cuèchi ío. ¹³ Te ñu-gá ní quide ní dáñá-ó nchàa ichi cuehé ichi duha núú táxí tnùní yucu ñávãha, te ní nachihi ñaha-gã xii-o

ndàha Déhe-gá Yaá ío cùu iní-gá. ¹⁴ Te Déhe-gá ní xíhí-gá cuèndá sá nchóó cǎcu nihnu-o nǔú ùhú núú ndàhú, te ní quide cǎhnu iní-gá nchaa sá cuèhé sá dúhá nǐ quide-o.

Ñǎyiu cùu ìⁿnuu ndihí Yá Ndiöxí cuèndá sá nǐ xíhí Xítóhó Jesucristú

¹⁵ Te Yá Ndiöxí cúu-gǎ Yaá vá cúu quèní-ó dico Xítóhó Jesucristú chi ní quixi túu-gá ñuyíú-a, te ní quide-gá nchaa nǎcuáa sàni iní-gá. Te dàtná-ni sàni iní-gá te ducaⁿ sàni iní Yá Ndiöxí, te Yaá-áⁿ ducaⁿ-ni ndècu-gá ndéé cǔtnàhá vátá ngǎva-gá ñuyíú. ¹⁶ Te Xítóhó Jesucristú ní quide-gá núú Yá Ndiöxí ní cadúha-gá nchaa sá ío andíu ndihí nchaa sá ío ñuyíú-a, te ní cadúha-gá nchaa sá cúu quèní núú-ó cùndehe-o, ndihí nchaa sá vǎ quèní tnàhí-o, ndihí nchaa espíritú cúnùu vihi xínu cuechi núú Yá Ndiöxí, ndihí nchaa dava-gá espíritú xínú cuèchi. Te nchaa ní cadúha Xítóhó Jesucristú chi ducaⁿ nǐ cachí Yá Ndiöxí cunduu. Te ducaⁿ nǐ cachí Yá Ndiöxí cunduu cuèndá nchaa cuu-xi mee-ni sá vǎha sá cúu-xí Xítóhó Jesucristú. ¹⁷ Te Xítóhó Jesucristú ducaⁿ-ni ndècu-gá ndéé cǔtnàhá vátá ngǎva-gá ñuyíú-a, te díu núú ndáhá-gǎ cándòdo ñuyíú-a, ndihí andíu, ndihí nchaandi túhú sá ío. ¹⁸ Te díu Xítóhó Jesucristú cúnùu-gá yíndàha ñaha-gá xii nchaa nchoo ñǎyiu ndècu ichi-gá, te díu-gá quidé-gǎ ndécú vǎha-o nǔú-gǎ. Te núú ncháá ñǎyiu ndoto díu-gá cúu-gǎ Yaá ío cǎhnu cuu sa ní ndoto, te sá dúcáⁿ nǐ ndoto-gá te xǎⁿ cúu-gǎ Yaá ío tàxi tnuní nchaandi túhú sá ío ñuyíú-a ndihí andíu. ¹⁹ Te ducaⁿ ío cùnùu-gá táxi tnùní-gá chi ndáá sá ìⁿ-ni cuu-gá ndihí Yá Ndiöxí. ²⁰ Te Xítóhó

Jesucrìstú ní xíhí-gá núú cùrúxí, chi ducaⁿ nǐ cuiní Yá Ndiǒxí cunduu cuèndá sá vǎ yǒo ìⁿ-gá cuu úhú iní ñáhá xii-gá cuèi ñáyiu xǐndecu ñuyíú-a, te cuèi cue espíritú ndécú àndiu.

²¹ Te nchòhó cútnàhá vátá cùndècu-gá-ndó ìchi Xítóhó Jesucrìstú ñá túú tnàhí nǐ xǒo cáháⁿ ndìhi-ndo-gǎ, chi mee-ni nǐ xóo cuu úhú iní-ndó-gǎ, te mee-ni nchàa sá cuèhé sá dúhá nǐ xóo cunuu nǐ xóo cada-ndo ni cùu, dico Xítóhó Jesucrìstú ní quide-gá ní tnahá tnúhu-ndo ndìhi Yá Ndiǒxí vitna. ²² Chi ñu cuèndá-áⁿ nǐ xíhí Xítóhó Jesucrìstú núú cùrúxí cuèndá sá nchóó ndùu ndoo nduu nine iní-ó ngǔndecu-o núú Yá Ndiǒxí, te ducaⁿ te ñá túú tnàhí-gá ná cumání-ó núú-gǎ, te vǎ yǒo ìⁿ-gá cachí sá nchóó ndècu cuéchi-o. ²³ Te núu vǎ dáñá ndéé-ndó quìndáá iní-ndó Xítóhó Jesucrìstú, te cundecu-ni-ndo ìchi-gá, te vǎ cání iní-ndó dàña-ndo tnúhu ndee iní ní taxi-gá ndécú ndìhi-o. Te nchaa tnúhu-gá-áⁿ tá xíté nuu-xi ñhìi ñuyíú cuǎháⁿ, te ñu-ni tnúhu-áⁿ càháⁿ yúhú té Pǎblú dánèhé-í ñáyiu.

Té Pǎblú yíhí ñíquí-dě cáháⁿ-dé tnúhu Xítóhó Jesucrìstú núú ñáyiu ndècu ichi-gá

²⁴ Te vitna ío cùdíí iní-í ndóhò-í cuèndá-ndó, chi Xítóhó Jesucrìstú ío ní ndoho-gá cuèndá-ó, te tnàhá yúhú ndóhò-í cuèndá nchaa ñáyiu ndècu ichi-gá, dico vitna cùmání-gǎ ndoho-í cuèndá-yu. ²⁵ Te Yá Ndiǒxí ní cachí-gá sá yǔhú quíhi ñíquí ñáhà-í xii nchaa nchòhó ñáyiu ndècu ichi-gá cuèndá danèhé ñáhá vǎha-í xii-ndo tnúhu-gá cuèndá cuu-xi sá vǎha sá cúú-xi-ndó. ²⁶ Te nchaa tnúhu sá dánèhé ñáhà-í xii-ndo ñá túú ní tècú dóho nchaa ñáyiu

ní xíndecu ndéé sanaha, te mee-gă ní cuiní-gá sá ncháá nchòo ñáyiú yíndaha-gá vitna cundecu ndìhi-o tnúhu-áⁿ. ²⁷ Te mee-gă ní cachí-gá sá dátũ-gá nchaa tnúhu sá ïo vii ío váha cuáháⁿ núú nchàa ñáyiú yíndaha-gá. Te tnúhu-áⁿ cúú-xí cuendá tnàhá nchaa nchòhó ñáyiú ñá túú cùu ñáyiú isràél. Te tnúhu-áⁿ dánèhé ñáhá-xí xii-ndo sá Xítóhó Jesucristú ndécú ndìhi ñaha-gá xii-ndo. Te cuendá xíáⁿ ní ngúndecu ndìhi-ndo tnúhu ndee ìní cundecu-ndo ndìhi-gá ni caa ni quíhíⁿ.

²⁸ Te nchúhú mee-ni cuendá Xítóhó Jesucristú càháⁿ váha-ndí, te dàsahú-ndí ñáyiú nàcuáa cadá-yu. Te váha vîhi danehé-ndí nchaa ñáyiú nàcuáa tecú tnùní-yu tnúhu-gá, te ducaⁿ dènehé-ndí-yu nàcuáa cundáá-yu núú Yă Ndiöxí, te ducaⁿ chi tnàhá tnúhu-yu ndìhi Xítóhó Jesucristú. ²⁹ Te cuendá xíáⁿ ío ndùcu ndee-í quidè-í chiuⁿ Xítóhó Jesucristú, te mee-gă ío chindee ñaha-gá xii-í nũu xíáⁿ ndácù-í quidè-í chiuⁿ-gá.

2

¹ Te cuiní-í sá nchòhó cutnùní iní-ndó sã ïo sàni iní-í cuendá-ndó, ndìhi cuendá nchaa ñáyiú ndècu ñuú Laodiceá, ñáyiú xíndecu ichi Xítóhó Jesucristú. Te ducaⁿ-ni ïo sàni iní-í cuendá nchaa ñáyiú vátá quíní ñáhá-gã xii-í. ² Te cuiní-í sá nchòhó ndìhi nchaa ñáyiú-áⁿ ïo nducu ndèe-ndo canchicúⁿ nihnu-ndo ichi Xítóhó Jesucristú, te ío cuu iní tnàhá-ndó, te ducaⁿ cùu ìⁿnuu-ndo cundecu-ndo. Te cuiní-í sá nchòhó ndìhi dava-gá ñáyiú-áⁿ ïo váha sáá sá xìní tnùní-ndó cuendá tecú tnùní-ndó nchàa nacuáa ndùu cuendá Xítóhó

Jesucrìstú chi ío ndùu yuhu ni cuu, dico vitna ní dátũu-gá núú-ó. ³ Te Xítóhó Jesucrìstú néhé vǎha-gá nchaa tnúhu sá ío xìni ñuhu-xi tecú tnùnì-ó. ⁴ Te duha càháⁿ-í chi cuìní-í sá vǎ quìndáá iní-ndó nì ñⁿ tnúhu càháⁿ nchaa ñáyiú cuìní dandàhú ñáhá xii-ndo cuéi ío váha càháⁿ-yu. ⁵ Te cuéi ñá túú ndècu ndihì ñaha-í xii-ndo dico ducaⁿ-ni ío ñuhu iní ñáhà-í, te ío cùdí ñí-í chi ñihí-í tnúhu sá ío cùu ñⁿnuu-ndo ndecu-ndo, te ñá túú dàña ndeé-ndó sàndáá iní-ndó Xítóhó Jesucrìstú.

⁶ Te dàtná-ni ní sàndáá iní-ndó Xítóhó Jesucrìstú, te ducaⁿ-ni quìndáá iní-ndó-gǎ canchicúⁿ nihnu-ndo ìchi-gá. ⁷ Te ni yùhu ni iní-ndó càchicúⁿ nihnu-ndo ìchi-gá, te ducaⁿ cuíta cutnuní-gá iní-ndó nchàa nacuáa càháⁿ-gá quíhíⁿ. Te vá dáña ndèé tnàhí-ndo quìndáá iní-ndó nchàa tnúhu sá ñí dánèhé ñáhá cuè téé càháⁿ tnúhu-gá xii-ndo. Te xìni ñuhu-xi ndacáⁿ táhú vèhi-ndo núú Yǎ Ndiǒxí cuèndá nchaa tnúhu-áⁿ.

Ñáyiú ío váha tnàhá tnúhu ndihì Xítóhó Jesucrìstú

⁸ Te ío quíhì iní-ndó cùndecu-ndo chi xìca cuu ñáyiú cuìní dandàhú ñáhá xii-ndo, te ñáyiú-áⁿ càháⁿ-yu mee-ni nchàa tnúhu ní cahu iní nchaa cue téé ñuyíú-a, te nchaa tnúhu-áⁿ ñǎ túú vèdana nàndíhì-xi. Te ducaⁿ quidé-yu chi nchìcúⁿ nihnu-ní-yu nchaa nàcuáa ní xóo cada ñáyiú ní xíndecu ndeé sanaha. Te càháⁿ-yu nàcuáa sàni iní yucu ñávǎha, te ñá túú càháⁿ-yu nàcuáa cuìní méé Xítóhó Jesucrìstú.

⁹ Te Xítóhó Jesucrìstú cúú-gǎ ñⁿ ñáyiú dico ñⁿ-ni cùu-gá ndihì Dútú Ndiǒxí. ¹⁰ Te nchòhó chi ñá túú tnàhí-gá ná cúmǎní-ndó núú-gǎ chi ndècu

ndihî-ndo Xítóhó Jesucrîstú. Te ío cùnûu-gá te tàxi tnuní-gá nchaa núú cuè espíritú cúnûu. ¹¹ Te mee-gã ní ndada ndoo ní ndada nine-gá iní-ndó chi ní ngúndecu ndihî-ndo-gã te ducaⁿ ñà túú-gã ndécú-ndó ìchi cuehé ichi duha, te cada iní-ndó sã ñî ngúndecu ndihî-ndo ìⁿ seña, chi ní ndada ndoo ní ndada nine-gá iní-ndó, dico ñá díú ìⁿ-ni cuu-xi ndihî seña sá sãha cue téé isrâél ñî-güedé. ¹² Te nchòhó sa ní sandute-ndo te cada iní-ndó sã dàtná tnúhu sá ñî xíhí-ndó ndihî Xítóhó Jesucrîstú, te ní nguíndüxi-ndo ndihî-gá, te ní ndoto-ndo ndihî-gá, te ducaⁿ càda iní-ndó chi ñá túú-gã ndécú-ndó ìchi cuehé ichi duha. Te ducaⁿ chi sàndáá iní-ndó nchàa nacuaá quide Yá Ndiöxí, te ñiu-gá ní dándótó-gã Xítóhó Jesucrîstú. ¹³ Te nchòhó cùtnàhá ndécú-ndó ìchi cuehé ichi duha cùu-ndo datná ñáyiu ní xíhí, chi ñá túú tnàhá tnúhu-ndo ndihî Yá Ndiöxí ní cùu, te ni ñà díú ñáyiu isrâél cùú-ndó. Te Yá Ndiöxí ní cachí-gá sá nchóó ío váha tnàhá tnúhu-o ndihî Xítóhó Jesucrîstú vitna. Te ducaⁿ ñî quide-gá chi sa ní quide càhnu iní-gá nchaa sá cuèhé sá dúhá ñî xóo cada-o. ¹⁴ Te vitna duuⁿ duuⁿ ñá túú-gã cuéchi-o ndècu núú-gã. Te nchoo ñà túú cuíní-ó càda-o nacuaá càháⁿ-gá, te cuèndá xíãⁿ ío ndècuéchi-o, te vâi nacháhu-o nùú-gã ní cùu. Te vitna ñá túú-gã ni ìⁿ cuéchi-o ndècu núú-gã, chi ñiu cuèndá-áⁿ ñî xíhí Xítóhó Jesucrîstú núú cùrúxí. ¹⁵ Te sá dúcáⁿ ñî xíhí Xítóhó Jesucrîstú núú cùrúxí, te duuⁿ duuⁿ ní dáquéé tîhú-gã sácúíhná ndihî nchaa espíritú cùndihî-xi, te ní quendóo canúú-xi, te mee-gã ío cùnûu-gá táxi tnùní-gá.

Nanducu nihnu-o mee-ni sá vǎha cǎchí Xítohó Jesucrístú

¹⁶ Te núu dava ñáyiú xǐcuèhé ñáhǎ-yú xii-ndo cuendá sá ñà túú xèxi-ndo xìhi-ndo datná quidé mèé-yú te vá cádá cuendá-ndó, te ni vǎ cádá cuendá-ndó te núu xǐcuèhé ñáhǎ-yú xii-ndo cuendá sá ñà túú cǎnehe íí-ndó víco quide meé-yú núú cuíá núú cuíá, ndihí vico quidé-yú ndi tnahá yóó, ndihí cuendá sá ñà túú cǎnehe íí-ndó ndùu nde-tatú-yú. ¹⁷ Te nàcuáa quidé-yú ndi tnahá òré quidé-yú nchaa vico-áⁿ, ndihí nàcuáa quidé-yú ndi tnahá nchaa nduu cǎnehe íí-yú-áⁿ, te cada iní-ó sǎ sà quidé-yú-áⁿ dánèhé núú ñáhá-xí nàcuáa cada Xítohó Jesucrístú núú cuáháⁿ núú vǎxi. ¹⁸ Te vá quíndáá iní-ndó ni ìⁿ tnúhu cǎháⁿ ñáyiú cǎchí sá cuíta nihnu-ndo cuendá sá ñǎ túú tnìⁿ-ndo tnúhu cǎháⁿ-yú, chí cǎchí-yú sá ío xini ñuhu-xi cada cahnu-o nchaa cue espíritú xínú cuèchi núú Yǎ Ndiǒxí, te ni yùhu ni iní-ó cǎnehe-o sá yíñùhu núú-xí. Te ñáyiú-áⁿ cǎchí-yú sá ndàá cǎháⁿ-yú chí dàcoto ñaha saní-yú nàcuáa cǎháⁿ-yú, te ío quide cahnú-yú mèé-yú cuendá nchaa sá sání iní mèé-yú quidé-yú, te ñá túú vǎdana nàndíhi nchaa sá quidé-yú. ¹⁹ Te nchaa ñáyiú ducaⁿ xǐquide-áⁿ ñà túú tnahá tnúhu-yú ndihí Xítohó Jesucrístú. Te mee-gǎ cúú-gǎ Yaá cúnùu taxi tñuní ñáhá-gǎ xii nchaa nchoo ñáyiú ndècu ichi-gá, te chindee ñaha-gá xii-o ndècu-o ichi-gá, te mee-gǎ quidé-gǎ cúú ìⁿnuu-o ndecu-o, te ta quide-o nchaa nacuáa cuiní Yǎ Ndiǒxí cuáháⁿ.

²⁰ Te nchòhó cúú-ndó dàtná ñáyiú ní xíhí ndihí Xítohó Jesucrístú cuendá sá vǎ cǎnchícúⁿ

nihnu-gá-ndó nàcuáa càháⁿ ñáyiú ñá túú ndècu ichi-gá. Te núu ducaⁿ ña, ¿te ná cuendá tñí-ní-ndó tñúhu càháⁿ ñáyiú-áⁿ te quide-ni-ndo datná quidě-yu? ²¹ Chi ñáyiú-áⁿ càchí-yu sá íó sá ni vǎ cúú tèe ndaha-o, te dava ni vǎ cúú càxi-o, te dava ni vǎ cúú tñí-o. ²² Te nchaa xíǎⁿ, núú néhé chiúⁿ-ni-o ndíhi nihnu-xi. Te nchaa sá dúcáⁿ càháⁿ-yu-áⁿ cúú-xí mée-ni sá ní cahu iní mée nchàa ñáyiú ñuyíú-a nàcuáa cadá-yu cundecú-yu. ²³ Te nchaa tñúhu càháⁿ-yu-áⁿ sánùu sá cúú-xí ñíⁿ tñúhu càháⁿ ñíⁿ téé ío váha sàá díquí-xi, chi càchí-yu sá cadá càhnu-o Yá Ndiǒxí nàcuáa véxi iní mée-ó, te cunduu ndàhú iní-ó dico ñá túú dānehé ñáhǎ-yu nàcuáa tàú-xi cunduu. Te càchí tucú-yu sá cadá ũhú-ó mée-o, chi ducaⁿ cuiní Yǎ Ndiǒxí cada-o càchí-yu. Te nchaa xíǎⁿ ñá túú vǎdana chindee ñaha-xi xii-o cuendá sá vǎ táxí tñúní ñáhá ní ñíⁿ sá cuéhé sá dúhá sàni iní-ó.

3

¹ Te nchòhó cada iní-ndó sǎ ní xíhí-ndó ndíhi Xítohó Jesucristú te ní ndoto-ndo ndíhi-gá, núu xíǎⁿ tàú-ndó càda-ndo nchaa sá vǎha dàtná cuiní mée-gǎ chi mee-gǎ núcǒo-gǎ xio cùha Dútú Ndiǒxí chi tñahá-gá ío cùnuu-gá. ² Te ío cuhuⁿ iní-ndó nchàa sá vǎha càchí Xítohó Jesucristú nduu táhú-ndó cūndecu ndíhi-ndo, te vǎ cúhúⁿ iní-ndó mée-ni nchaa sá íó ñuyíú-a. ³ Te ducaⁿ càda-ndo chi cùu-ndo datná ñáyiú ní xíhí ndíhi Xítohó Jesucristú, chi ñá túú-gǎ ndécú-ndó ìchi cuehé ichi duha. Te Yá Ndiǒxí néhé cuendá ñáhá-gǎ xii-ndo chi tñahá tñúhu-ndo ndíhi Xítohó Jesucristú. ⁴ Te Xítohó Jesucristú cúú-gǎ Yaá ndécú ndíhi ñaha xii-o vitna,

te sáá nduu quèe túu ndihi ñaha-gă xii-o àndiu, te tnàhá-ó ío cunuu-o ndihi-gá.

Duuⁿ duuⁿ dañ-a-o nchàa sá cuèhé sá dúhá ñùhu iní-ó te cada-o mèe-ni sá vǎha

⁵ Te duuⁿ duuⁿ dañ-ndo nchàa sá cuèhé sá dúhá ñùhu iní-ndó. Te nchaa nchòhó cue tée vá càháⁿ ndihi-ndo ñăyiu dîhí te núu ñá díú ñàdîhí-ndó cùú-yu, te ducaⁿ-ni nchàa nchohó cue ñăyiu dîhí tucu vá càháⁿ ndihi-ndo cuè tée te núu ñá díú yì-ndo cuu-güedé, te nchaa-ndo vǎ cání-gǎ iní-ndó càda-ndo ni ìⁿ sá cuèhé sá dúhá ndihi tnaha ñăyiu-ndo. Te vá cání cuèhé cani duha-gá iní-ndó sǎ cúú-xí-ndó ndihí-yu, te vá cání-gǎ iní-ndó ni ìⁿ sá cuèhé sá dúhá, te ni vǎ xíhó-ndó ìⁿ sá ndécú ndihi tnaha ñăyiu-ndo, chi núu ducaⁿ na càda-ndo xiho-ndo sá ndécú ndihí-yu te ìⁿ-ni cùu-ndo ndihi ñăyiu chîñuhu nchaa sá càchí-yu cùu ndióxí te ñá ndàá sá ndiöxí cúú nchàa xǎⁿ. ⁶ Te nchaa ñăyiu ducaⁿ xǎquide ío dandòho ñaha Yá Ndiöxí xí-yu na sàá nduu tnúndòho tnúhu ndàhú, chi ñá túú sàndáá iní ñáhǎ-yu xii-gá. ⁷ Te nchòhó cùtnàhá ní xíndecu-ndo ìchi cuehé ìchi duha, te tnàhá-ndó ní xóo cada-ndo dàtná quidé nchàa ñăyiu-áⁿ. ⁸ Te vitna duuⁿ duuⁿ dañ-ndo nchàa sá ná càchí tnúhu-í-a: Vá cùdǎéⁿ-gǎ-ndó, te ni vǎ cùndùu líhli-gá iní-ndó, te ni vǎ cúú ùhú-gá iní-ndó tnàha ñăyiu-ndo, te ni vǎ cùcuèhé-gá-ndǎ-yu, te ni ìⁿ-gá tnúhu cuèhé vá càháⁿ-ndó. ⁹ Te ni vǎ dácuàndehnde-gá-ndó, chi nchòhó sa ní dáñá-ndó nchàa ìchi cuehé ìchi duha, te ñá túú-gǎ sání cuèhé sání dùha iní-ndó ñă cada-ndo vitna datná ní xóo cada-ndo. ¹⁰ Te vitna nchòhó ní nduu-ndo

ñáyiú váha, te uuⁿ-gá tá cùtnuní iní-ndó nchàa nacuáa cuíní Yá Ndiõxí cada-ndo, te ducaⁿ ta ndùcu ndee-ndo quide-ndo mee-ni sá vâha dàtná quidé mèe-gá. ¹¹ Te vitna ní ngúndecu ndihí-ndo Xítohó Jesucristú, te vá cáda cuendá-gá-ndó nõu cùu-ndo ñáyiú isràél àdi ñá túú cùu-ndo, te ni vâ cáda cuendá-ndó nõu cùu-ndo ñáyiú ní ngúndecu sèñá ñi-xi àdi ñáhá, te ni vâ cáda cuendá-ndó nõu cùu-ndo ñáyiú véxi ñuú xícá, te ni vâ cáda cuendá-ndó nõu cùu-ndo ñáyiú cùu neñuú, te ni vâ cáda cuendá-ndó nõu cùu-ndo ñáyiú ñá túú tnàhí dàñá quee núú chíúⁿ pàtróoⁿ-xi, te ni vâ cáda cuendá-ndó nõu cùu-ndo ñáyiú dàñá quéé nõú chíúⁿ pàtróoⁿ-xi, chi Xítohó Jesucristú cúnùu-gá ndécú ndihí ñaha-gá xii-o nchàa-o.

¹² Te Yá Ndiõxí ní dáquéé dèⁿ ñaha-gá xii-ndo cuendá cundecu-ndo ndihí-gá, te vitna cùu-ndo ñáyiú quide ndáá ndécú ìchi-gá. Te mee-gã ío cùu iní ñáhá-gã xii-ndo nõu xíáⁿ tàú-ndó cùndahú iní tnáhá-ndó, te ío váha cuu iní-ndó chindee tnaha-ndo, te cuu-ndo ñáyiú ndàhú iní-xi, te ío vii ío váha cuu iní-ndó cùndecu ndihí tnaha-ndo, te ío càhnu cunduu iní-ndó cuendá nchaa sá quidé ñàha ñáyiú xii-ndo. ¹³ Te ducaⁿ cànehe-ndo tnúhu càhnu iní núú ndi mèe-ndo nacuáa ndècu-ndo ichi-gá, te cada càhnu tucu iní-ndó nõu ná cúú sã cúmãní nõú tnáhá-ndó. Te dàtná ní quide càhnu iní Xítohó Jesucristú nchaa sá ñà túú vâha ní xóo cada-ndo ducaⁿ càda-ndo cada càhnu iní-ndó nchàa sá cúmãní nõú tnáhá-ndó ndècu-ndo. ¹⁴ Te xìni ñuhu vihi-xi sá ío cuu iní tnáhá-ndó cùndecu-ndo, chi núú ducaⁿ na càda-ndo, te quide-ndo nchaa dava-gá sá càháⁿ-í, te ñá túú tnàhí-gá ná cúmãní-ndó.

15 Te dañá-ndo sã Yã Ndiõxí ná chìndee ñaha-gá nàcuáa ío váha cuu iní-ndó cùndecu-ndo, chi ñi cuendá-án ñi cáháñ ñáhá Yã Ndiõxí xii-ndo cuendá cuu ññuu-ndo ndìhi nchaa dava-gá ñáyi ndècu ichi-gá, te ducañ-ni ño ndacáñ táhú-ndó nùú-gã.

16 Te ío cuhuñ iní-ndó tnñhu Xítóhó Jesucristú, te ío váha cuáha-ndo cuendá nàcuáa cáháñ tnúhu-gá te ducañ dànehé tnáhá-ndó. Te ío cáháñ dóho tnàha-ndo nacuáa cada-ndo càncicúñ nihnu-ndo càda-ndo nchaa nacuáa cáháñ tnúhu-gá, te cata-ndo ndùdú ndèé núú tütú Yã Ndiõxí, ndìhi nchaa dava-gá ndudú sá xìní méé-ndó xíta-ndo te nchaa xíñ cata-ndo chññhu-ndo Yá Ndiõxí. Te òré xítá-ndó te ñi yùhu ñi iní-ndó ndàcáñ táhú-ndó nùú-gã. 17 Te cuhuñ iní-ndó Xítóhó Jesucristú òré sání iní-ndó càda-ndo ññ chiuñ àdi ná tnúhu cuiní-ndó cáháñ-ndó, te ñi-ni-gá cuhuñ iní-ndó. Te xìní ññhu-xi ndacáñ táhú-ndó nùú Yã Ndiõxí, te ñi-ni Xítóhó Jesucristú chindee ñaha-gá xii-ndo ndàcáñ táhú-ndó nùú Tátá-ó Dütú Ndiõxí.

Nàcuáa tàù ñáyi ndècu ichi Xítóhó Jesucristú cada-yu sá cúú-xí ññ meé-yu

18 Te nchaa nchòhó ñáyi ññ ñáyi ndècu yñ-xi quindáa iní-ndó yñ-ndo, chi ducañ tàù-xi cada nchaa ñáyi ññ ndécú ichi Xítóhó Jesucristú. 19 Te nchaa nchòhó cue téé ndècu ñadìhí-xi cuu iní-ndó ñadìhí-ndó, te vá cùcuèhé-ndõ-yu. 20 Te nchaa nchòhó ñáyi ndècu tátá-xi ndìhi ññá-xi quindáa iní-ndõ-yu, chi núú ducañ na càda-ndo te ndùu vétú iní Yã Ndiõxí. 21 Te nchaa nchòhó ñáyi cùu tátá ndìhi ññá vá dásátú-ndó iní cue déhe-ndo, chi núú ducañ na càda-ndo te ñi vã quíxí-gã iní-güexi cada-güexi sá vãha. 22 Te nchaa nchòhó

ñáyiú xìnu cuechi quíndáá iní-ndó nchàa ñáyiú cùu patróón-ndó, te ñi yùhu ñi iní-ndó càda-ndo nchaa chiuⁿ tahú-yu cuèi òré ndécũ-yu àdi oré ñá túŷ-yu, te ñá díú òré-ñi ndèhé-yu cada-ndo cuèndá-ñi sá cuèní-ndó cùdiu-ndo núŷ-yu, chi cada-ndo sã néhé-ndó sà yíñùhu núú Xítóhó Jesucristú. ²³ Te nchaa chiúⁿ sani iní-ndó càda-ndo te cada-ndo ñi yuhu ñi iní-ndó, te sá dúcáⁿ càda-ndo-áⁿ te cada-ndo cuèndá sá xínú cuèchi-ndo núú Xítóhó Jesucristú te ñá díú núú ñáyiú ñuyíú-a xìnu cuechi-ndo. ²⁴ Te nchòhó sa ñaha-ndo sá Xítóhó Jesucristú taxi-gá sá ndúú táhú-ndó te núu ducaⁿ na càda-ndo, chi cùu-ndo ñáyiú xìnu cuechi núú-gã. ²⁵ Te nchaa ñáyiú quíde nchaa sá cuèhé sá dúhá nàcháhu-yu núú Yã Ndiõxí cuèndá nchaa sá quídě-yu, te mee-gã vá cádá cuèndá-gá cuèi náí ñáyiú cùú-yu, chi ncháá-yu nacháhu-yu nchaa sá ñá túú vãha quídé-yu núú-gã.

4

¹ Te nchaa nchòhó ñáyiú cùu patróónⁿ cuu-ndo ñáyiú váha, te cada-ndo nchàa nacuáa tàú-xi cunduú ndihí nchaa ñáyiú xìnu cuechi núú-ndó, te cunaha-ndo sã àndiú ndecu Yaá cúú Xítóhó-ndó tàxi tñuní ñáhá-gã xii-ndo.

² Te nchaa nchòhó ñáyiú ndècu ichi Xítóhó Jesucristú, vá dáñá ndèé-ndó cãháⁿ ndihí-ndo Yã Ndiõxí, te ío cuhuⁿ iní-ndó-gã òré cãháⁿ ndihí-ndo-gã, te òré-áⁿ ío ndacáⁿ táhú-ndó núú-gã.

³ Te cácaⁿ táhú-ndó tñahá cuèndá-ndí núú-gã cuèndá sá díú-gã ná cádá te ndacu-ndí cãháⁿ-ndí tñúhu-gá núú nchàa dava-gá ñáyiú, te ducaⁿ

cáháⁿ-ndí tnúhu Xítohó Jesucrístú sá ñă túú ní xĩndecu ndihí nchaa ñáyiú ní xĩndecu ndéé sanaha, te ðiu cuendá tnúhu-áⁿ yíhí-í vecaá vitna. ⁴ Te cáháⁿ ndihí-ndo Yă Ndiõxí cuendá cáháⁿ-í nàcuáa tàú-xi cunduu te tecú tnùní-yu.

⁵ Te cada-ndo nchàa nacuáa tàú-xi cunduu sá cúú-xí nchàa ñáyiú ñá túú ndècu ichi-gá, te ducaⁿ-ni ïo nducu ndèe-ndo cada-ndo nchaa nacuáa tàú-xi cunduu. ⁶ Te cada cuendá-ndó sã ïo vii ïo váha cunduu tnúhu cáháⁿ ndihí-ndõ-yu, te cáháⁿ-ndó ñⁿ tnúhu nàcuáa cuu váha iní-yu, te ïo váha cundehe-ndo nàcuáa cunduu tnúhu cúñaha-ndo xì ñⁿ ñⁿ-yu.

Tnúhu ndéé núú ñí ndihí-ná

⁷ Te té Tiquicú téé ïo cùu iní-ó ndècu ndihí-o ichi Xítohó Jesucrístú, téé-áⁿ cachí tnúhu-dé nchaa nàcuáa cùu ndecu-í. Te tnàhá-dé xinú cuèchi-dé núú Xítohó Jesucrístú te ïo váha quide ndáá-dé.

⁸ Te tendaha-í-dé quixi-dé cachí tnúhu-dé nchaa nàcuáa cùu ndecu-ndí iha, te taxi-dé tnúhu ndee iní cundecu ndihí-ndo. ⁹ Te tnàhá tucu té Ònésimú téé ïo cùu iní-ó ndècu ndihí-o ichi Xítohó Jesucrístú quixi ndihí-dé, te ðiu-ni téé ñuú-ndó cùu-dé te tnàhá-dé ïo váha quide ndáá-dé. Te ndi nduú-güedé cachí tnúhu-güedé nchaa nàcuáa cùu iha.

¹⁰ Te té Arístarcú téé yíhí ndihí-í vecaá quidé ndèe iní ñáhá-dě xii-ndo ndihí té Măcú ñaní pĩmú tẽ Bèé. Te sa nàha-ndo nchaa nacuáa ní cáháⁿ-í cada-ndo quèheⁿ cuendá-ndó tẽ Măcú, te núu na quixi-dé quixi coto ñaha-dě xii-ndo, te ïo váha cuu iní-ndó quèheⁿ cuendá-ndó-dě. ¹¹ Te tnàhá téé nàni Jesús, àdi Bustú chi úú ðiú-dé, quidé ndèe

iní ñáhá-dě xii-ndo. Te cue téa-a cùu-güedé cue téa israhél ní chitnahá ñáhá-güedě xii-í càháⁿ-ndí núú ñáyiú nàcuáa ndíhu ndaha ñàha Yá Ndiöxí xii-yu, te ni ñⁿ-gá ñáyiú israhél ñá túú quíde datná quíde-güedě. Te ío váha tàxi-güedé tnúhu ndee iní xii-í. ¹² Te tnàhá téa ñuú-ndó tē Ępafrás quíde ndèe iní ñáhá-dě xii-ndo, te cùu-dé tnàhá-dé téa xínu cuechi núú Xítohó Jesucristú. Te ducaⁿ-ni nì yuhu ni iní-dé xicáⁿ táhú-dě núú Yá Ndiöxí cuendá-ndó cuendá sá cáncícúⁿ nihnu-ni-ndo ìchi-gá, te ducaⁿ te ío váha tecú tnùn-ndó nchàa nacuáa cuení Yá Ndiöxí cada-ndo, te ñuú-ni ducaⁿ cáncícúⁿ nihnu-ndo càda-ndo. ¹³ Te yúhú càchí tnúhu ndáá-í xii-ndo sã sũúni sàni iní-dé sá méé-ní sã vãha cuu xii-ndo cùndecu-ndo ndíhi nchaa ñáyiú xíndecu ichi Xítohó Jesucristú ndécú ñuú Laodiceá, ndíhi nchaa ñáyiú xíndecu tucu ichi-gá ndécú ñuú Hièrapólís. ¹⁴ Te tnàhá téa Lùcá téa xini nchaa núú yücú sã quíde tátna quíde ndee iní ñáhá-dě xii-ndo téa ío cùu iní-ó, te tnàhá tucu téa Dēmás quíde ndèe iní ñáhá-dě xii-ndo.

¹⁵ Te cúñaha-ndo na càda ndee iní nchaa ñáyiú ndècu ndíhi-o ichi Xítohó Jesucristú ndécú ñuú Laodiceá, ndíhi tá Mínfás, ndíhi nchaa ñáyiú ndècu ichi-gá tàcá vehe-xi dàcuahá-yu tnúhu-gá. ¹⁶ Te tutú cádũha-í-a tendaha-í quixi ndaha-ndo, te òré ná ndíhí dàcuaha-ndo te tendaha-ndo quíhíⁿ ndaha ñáyiú xíndecu ichi-gá ndécú ñuú Laodiceá cuendá dacuàhá-yu tnàhá-yu. Te ñuú-ni ducaⁿ dàcuaha-ndo tutú tendaha-í quíhíⁿ ndaha ñáyiú ñuú Laodiceá òré ná dándixí-yu ndaha-ndo. ¹⁷ Te na càchí tnúhu-í xii-ndo nàcuáa cúñaha-ndo xì té Àrquipú, te duha

cúñaha-ndo xìi-dé: “Yá Ndiöxí ní taxi-gá chiuⁿ quide-n, te ío váha cada cuèndá-n càda-n nchaa nacuáa ní cachí-gá”, duha cúñaha-ndo xìi-dé.

¹⁸ Te yúhú té Păblú ndihî ndaha mee-î tée-í ìîⁿ ŭú tnúhu-a quide ndee iní ñáhà-í xii-ndo, te cunaha-ndo sǎ yúhú yíhî-í vecaá. Te Yá Ndiöxí ío na chîndee chitúu ñaha-gǎ xii-ndo. Te ducaⁿ na cùnduu. Te ío chí cádá ndèe iní-nǎ vitna.

Tnúhu ní cáháⁿ yă ndiöxí xito cùu uú
New Testament in Mixtec, Peñoles (MX:mil:Mixtec,
Peñoles)

copyright © 2002 Wycliffe Bible Translators, Inc.

Language: Mixtec, Peñoles

Translation by: Wycliffe Bible Translators, Inc.

Mixteco, Peñoles [mil], Mexico

Copyright Information

© 2002, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Peñoles

© 2002, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 21 Feb 2024 from source files
dated 29 Jan 2022

872f7754-0986-5ecd-a059-925a708a6939